

КАНОН УМИЛИТЕЛЬНЫЙ КО ГОСПОДУ НАШЕМУ ИИСУСУ ХРИСТУ

Молитвами святых отец наших, Господи Иисусе Христе Боже наш, помилуй нас. Аминь.

Трисвятое. Пресвятая Троице: Слава, и ныне: Отче наш: Господи, помилуй. (12 раз.) Слава, и ныне: Приидите, поклонимся (Трижды.)¹ Псалом 50.

КАНОН, глас 2-й

Песнь 1

Ирмос: Во глубине постла иногда фараонитское всевоинство преоруженная сила, воплощенное же Слово всезлбный грех потребило есть: препрославленный Господь, славно бо прославися.

Припев: Иисусе Сладчайший, спаси мя.

или: Господи Иисусе Христе, Сыне Божий, помилуй мя грешного.

Иисусе Сладчайший Христе, Иисусе долготерпеливе, души моя язвы исцели, Иисусе, и услади сердце мое, Многомилостиве, молюся, Иисусе Спасе мой, да величаю Тя, спасаемый.

Припев.

Иисусе Сладчайший Христе, Иисусе, отверзи покаяния ми дверь, человеколюбче Иисусе, и прими мя, Тебе припадающая и тепле просяща, Иисусе Спасе мой, согрешений прощения.

Слава: Иисусе Сладчайший Христе, Иисусе, исхити мя из руки льстиваго велиара, Иисусе, и сотвори деснаго предстоятеля славы Твоея, Иисусе Спасе мой, части шуйи мя избавляяй.

И ныне: Иисуса рождающая Бога, Владычице, моли о непотребных рабех, Пречистая, яко да муки молитвами Твоими избавимся, Нескверная, осквернении, славы присносущныя наслаждающесе.

Песнь 3

Ирмос: На камени мя веры утвердив, расширил еси уста моя на враги моя. Возвесели бо ся дух мой, внемгда пети: несть свят, якоже Бог наш, и несть праведен паче Тебе, Господи.

Припев.

Услыши, человеколюбче Иисусе мой, раба Твоего, вопиющая во умилении, и избави мя, Иисусе, осуждения и муки, единые

¹ Полный текст этих молитв см в разделе «Молитвы утренние»

долготерпеливе, Иисусе Сладчайший многомилостиве.

Припев.

Подыми раба Твоего, Иисусе мой, припадающая со слезами, Иисусе мой, и спаси, Иисусе мой, кающегося мя и геенны, Владыко, избави, Иисусе Сладчайший многомилостиве.

Слава: Время, Иисусе мой, еже дал ми еси, во страсти иждих, Иисусе мой. Темже, Иисусе мой, не отвержи мя, но воззови, молюся, Владыко Иисусе Сладчайший, и спаси.

И ныне: Дево, рождающая Иисуса моего, моли избавити мя геенны, едино предстательство оскорбляемых, Богоблагодатная, и сподоби мя жизни, Всенепорочная, нестаряющаяся.

Господи, помилуй. (Трижды.)

Седален, глас 1-й

Спасе мой Иисусе, блуднаго спасый, Спасе мой Иисусе, приемый блудницу, и мене ныне помилуй, Иисусе многомилостиве, спаси, ущедри, о Иисусе благодетелю, якоже, Благоутробне, Манассию, Иисусе мой, яко Един человеколюбец.

Слава, и ныне: Молитвы Своих раб прими, Богородице, и избави ны от всякия беды, яко рождающая Христа Спаса, избавителя душ наших.

[В среду и пятницу:

Слава, и ныне: Иже Твое заступление стяжавше, Пречистая, Твоими молитвами от бед избавляемся, и Крестом Сына Твоего всегда сохраняемы, по долгу Тя вси благочестно величаем.]

Песнь 4

Ирмос: Пришел еси от Девы, не ходатай, ни Ангел, но Сам, Господи, воплощся, и спасл еси всего мя человека. Тем зову Ти: слава силе Твоей, Господи.

Припев.

Исцели, Иисусе мой, души моея язвы, Иисусе мой, молюся, и руки мя исхити, Иисусе мой благоутробне, душегубнаго велиара, и спаси.

Припев.

Согреших, Иисусе мой Сладчайший, благоутробне; Иисусе мой, спаси мя, прибегающего к покрову Твоему, Иисусе долготерпеливе,

и Царствия Твоего мя сподоби.

Слава: Никтоже согреші, Иисусе мой, якоже согреших аз, окаянный, но припадаю моляся, Иисусе мой, спаси мя и жизни, Иисусе мой, наследие ми даруй.

И ныне: Всепетая, Иисуса рождающая Господа, Того моли избавити муки вся, поющая Тя, и Богородицу воистинну именующая.

Песнь 5

Ирмос: Просвещение во тме лежащих, спасение отчаянных, Христе Спасе мой, к Тебе утренюю, Царю мира, просвети мя сиянием Твоим: иного бо разве Тебе бога не знаю.

Припев.

Ты просвещение, Иисусе мой, ума моего, Ты спасение отчаянных душ моя, Спасе, Ты, Иисусе мой, муки избави и геенны мя, зовуща: спаси, Иисусе мой Христе, мя окаяннаго.

Припев.

Всеконечно, Иисусе мой, ко страсти безчестия низвержен ныне зову: Ты, Иисусе мой, помощи ми руку низпослав, исторгни зовуща: спаси, Иисусе мой Христе, мя окаяннаго.

Слава: Осквернен ум, Иисусе мой, обнося, взываю Ти: очисти мя от скверны прегрешений и избави мя во глубины злобы от неведения низпоползшагося, Спасе Иисусе мой, и спаси мя, молюся.

И ныне: Иисуса рождающая, Отроковице Богородительнице, Того умоли спасти вся православныя, монахи и мирския, и геенны избавити зовущия: разве Тебе предательства твердаго не знаем.

Песнь 6

Ирмос: В бездне греховней валяясь, неизследную милосердия Твоего призываю бездну: от тли, Боже, мя возведи.

Припев.

Иисусе мой Христе многомилостиве, исповедающаяся прими мя, Владыко, о Иисусе, и спаси мя, и от тли, Иисусе, мя исхити.

Припев.

Иисусе мой, никтоже бысть ин блудник, якоже аз, страстный, о Иисусе человеколюбче: но Ты, Иисусе, мя спаси.

Слава: Иисусе мой, блудницу и блуднаго, и Манассию и мытаря преидох, о Иисусе мой, страстьми, и разбойника, Иисусе, и ниневитяны.

И ныне: Иисуса Христа моего рождающая, Пречистая Дево, едина нескверная, осквернена суща мя молитв Твоих иссопом ныне

очи́сти.

Го́споди, поми́луй. (*Трижды.*) Слава, и ныне:

Кондак, глас 6-й

Иисúсе Спа́се, очи́сти и спаси́ мя, я́коже иногда́ блудни́цу, разбо́йника же и блу́днаго, и мене́ ны́не поми́луй, Всеще́дре и Благосе́рде Го́споди, и му́ки изба́ви мя, моли́твами Пречи́стыя Твоея́ и Всепе́тыя Ма́тере.

Икос

Земна́я и вре́менная возлюбих, ве́чных благ лишихся, Христé Иисúсе, Еди́не человеколю́бче, грешников не отсека́емая наде́жда, но ми́лость ка́ющимся проли́я, и мене́ ны́не ка́ющаяся не прэзри, Иисúсе, разумéю бо разбо́йника исповеданием спасена, и мытаря́ ми́лостью очи́щена, та́ко и блудни́цу помышля́ю пла́кавшуся, я́ко всем сих положи́л еси́ о́бразы покая́ния. Прети́ши бо ми́лостивне, и милосе́рдуеши. Те́пле ка́ющаяся ви́диши, и проти́ву тече́ши я́ко Оте́ц. Аще́ у́бо восхо́щеша, мо́щен бо еси́ и моя́ отпусти́ти грехи́, и́миже по креще́нном обе́те оскверни́хся, но чистоту́ я́ко Бог пода́ждь ми, моли́твами Пречи́стая Твоея́ и Всепе́тыя Ма́тере.

Песнь 7

Ирмос: Обра́зу злато́му на по́ле Деи́ре служи́му, три́е Твои́ о́троцы небрего́ша безбо́жнаго велéния, посреде́ же огня́ вве́ржени, ороша́еми по́яху: благословéн еси́, Бо́же отец на́ших.

Прпев.

Христé Иисúсе, никто́же согреши́ на земли́ от ве́ка, о Иисúсе мой, я́коже согреших аз, окая́нный и блу́дный. Те́мже, Иисúсе мой, вопи́ю Ти: пою́ща мя уще́дри, благословéн еси́, Бо́же отец на́ших.

Прпев.

Христé Иисúсе, ко стра́ху Твоему́, вопи́ю, пригвозди́ мя, о Иисúсе мой, и окорми́ ны́не ко пристани́щу благооти́шному, я́ко да, Иисúсе мой ще́дре, пою́ Ти спаса́емый: благословéн еси́, Бо́же отец на́ших.

Слава: Христé Иисúсе, тма́ми обеща́х Тебе́, стра́стный, о Иисúсе мой, покая́ние, но солга́х окая́нный. Те́мже, Иисúсе мой, вопи́ю Ти: нечу́вственне пребыва́ющую ду́шу мою́ просвети́, Христé, отец Бо́же благословéн еси́.

И ныне: Христá Иисúса ро́ждшая стра́нно и па́че естества́, Того́ моли́, Всенепоро́чная, я́же чрез естество́ моя́ прегрешéния вся прости́ти ми, Отрокови́це, да зову́ спаса́емь: благословéна еси́, Бо́га плóтию ро́ждшая.

Песнь 8

Ирмос: В пещь огненную ко отроком еврейским снишедшаго и пламень в росу преложшаго Бога, пойте, дела, яко Господа, и превозносите во вся веки.

Припев.

Тя, Иисусе мой, молю: якоже блудницу, Иисусе мой, избавил еси многих согрешений, тако и мене, Иисусе Христе мой, избави, и очисти оскверненную душу мою, Иисусе мой.

Припев.

Преклонився, Иисусе, безсловесными сластми, безсловесен явихся и скотом воистинну, Иисусе мой, страстно окаянный уподобихся; темже, Иисусе, безсловесия мя избави.

Слава: Впад, о Иисусе, в душеленныя разбойники, обнажхся одежды, Иисусе мой, боготканныя ныне, и лежу ранами уязвлен; елей, Христе мой, возлей на мя и вино.

И ныне: Иисуса моего и Бога носившая Христа несказанно, Богородице Марие, Того моли присно от бед спастися рабом Твоим, и певцем Твоим, Неискусомужная Дево.

Песнь 9

Ирмос: От Бога Бога Слова, неизреченною мудростию пришедшаго обновити Адама, ядию в тление падшаго люте, от Святыя Девы неизреченно воплотившагося нас ради, вернии единомудренно песнями величаем.

Припев.

Манассию, Иисусе мой, мытаря, блудницу, блуднаго, щедре Иисусе, и разбойника преидох, Иисусе мой, в делех студных и безместных, Иисусе; но Ты, Иисусе мой, предварив, мя спаси.

Припев.

От Адама, Иисусе мой, согрешившия вся, прежде закона и в законе, Иисусе, и по законе, окаянный, и благодати, Иисусе мой, победих страстми окаянно; но Ты, Иисусе мой, судьбами Твоими спаси мя.

Слава: Да не отлучен буду, Иисусе мой, неизреченныя Твоея славы, да не улучу части, Иисусе, шуия, Сладчайший Иисусе; но Ты мя десным овцам Твоим, Христе Иисусе мой, сочетав упокой, яко благоутробен.

И ныне: Иисуса, Богородице, Егоже носила еси, едина неискусомужная Дево Марие, Того, Чистая, умилостави, яко Сына Твоего и Зиждителя, избавити притекающия к Тебе искушений и бед, и огня будущего.

Молитва ко Господу нашему Иисусу Христу

Владыко Господи Иисусе Христе Боже наш, Иже неизреченнаго ради Твоего человеколюбия на конец веков в плоть оболкыйся от Приснодевы Марии, славим о нас Твое спасительное промышление раби Твои, Владыко; песнословим Тя, яко Тебе ради Отца познахом; благословим Тя, Егоже ради и Дух Святыи в мир прииде, поклоняемся Твоей по плоти Пречистой Матери, таковой страшней тайне послужившей; восхваляем Твоя Ангельская ликостояния, яко воспеватели и служители Твоего величества; ублажаем Предтечу Иоанна, Тебе крестившаго, Господи; почитаем и провозвестившия Тя пророки, прославляем апостолы Твоя святыя; торжествуем же и мученики, священники же Твоя славим; поклоняемся преподобным Твоим, и вся Твоя праведники пестунствуем. Таковаго и толикаго многаго и неизреченнаго лика Божественнаго в молитву приводим Тебе, всещедрому Богу, раби Твои, и сего ради просим нашим согрешением прощение, еже даруй нам всех Твоих Ради святых, изряднее же святых Твоих щедрот, яко благословен еси во веки. Аминь.

Достойно есть яко воистину блажити Тя Богородицу, Присноблаженную и Пренепорочную и Матерь Бога нашего. Честнейшую Херувим и славнейшую без сравнения Серафим, без истления Бога Слова рождшую, сущую Богородицу Тя величаем. *(Поклон)*

Слава, и ныне: Господи, помилуй. *(Трижды.)* Господи, благослови.

Господи, Иисусе Христе, Сыне Божий, молитвами Пречистыя Твоея Матере, преподобных и богоносных отец наших и всех святых помилуй и спаси нас, яко Благ и Человеколюбец. Аминь.